

الراية السوداء

محمد عايش شريف

الراية السوداء

شخصيات المسرحية :

الشيخ صوان	: شيخ قبيلة الصواوين
حسان	: زعيم المطايرد الشرقية
الشيخ مشاهد	: أحد رجال المقاومة الوطنية
شحات	: صديق مجاهد
الشيخ صخر	: شيخ قبيلة الصخران
عواد	: زعيم المطايرد الغربية
سالة	: بنت الشيخ صوان وخطيبة مجاهد
مجاهد	: بطل الرواية
المرأة العجوز	: تبحث عن ولدها المفقود
نسيم	: أحد شباب القبيلة
أفراد القبائل	: من كل قبيلة مجموعة

مسرحية (الراية السوداء)

المشهد الأول

المنظر

:الديكور في منتصف المسرح بئر مياه عليه غطاء على شكل
قبعة أجنبية وموصل من اليمين واليسار بالكوابيس بسور من
سيوف مكسورة عليها جماجم مقطوعة وفوق البئر راية
سوداء تدل على الخصام والفرقة .. مع رفع الستار تبدأ
رقصة تعبيرية ... أحد الرجال مصلوب فوق البئر ومجموعة
من القبائل تحمل دمية لخيال الماتى وهي تدخل من يمين
ويسار المسرح في شكل شبه جنانزي وتقوم بالطواف حول
البئر والرجل المصلوب وهي تردد :

إحنا رجال العرب يا جوم

بيننا العـــــــز دايـم دوم

ما نرضى بغاصب يعاديننا

وان جانا نزود عن أراضينا

العقل في الرأس زينة

وعقولنا ليش صارت زينة

وإحنا رجال العرب يا جوم

بيننا العـــــــز دايـم دوم

بعد انتهاء الأغنية تبدأ هذه المجموع في عمل إشارات
على هيئة أصوات حيوانية بشكل يبدو وحشيا وتذهب في
اتجاه الرجل المصلوب وهي تلبس أقنعة لوحوش أسطوانية
وحیوانات تقوم بنهش الرجل المصلوب فيصرخ صرخة عالية
مع إظلام .. ثم يضاء الجانب الأيمن من المسرح بحيث يظهر
المسرح مقسوم إلى قسمين .. في اليمين قبيلة الصواوين وفي
اليسار قبيلة الصخران .

(يدخل الشيخ صوان شيخ قبيلة الصواوين ومعه حسان
زعيم المطاريد الشرقية)

صوان : شفت يا حسان .. خدنا النار ومحينا العمار .. وطخينا
لصخر رجلين من رجاله مقابل الراجل إلى طخوه من رجائنا
وما فيه مشاكل ..

حسان : تسلم يا شيخ صوان .. يا سيد القبيلة وتسلم رجالك ..
صوان : وحد الله .. لاجعل صخر ورجاله عبرة للمخلق .. لحد ما
يجي راكم تحت القدم نادم .

حسان : وكيف ما يركع وأنت الأقوى والأصلب .
صوان : قال يريد يصير هو شيخ القبيلة . يبقى فيه مشاكل .
حسان : صابه جنون الزعامة والكبر
صوان : أنا شيخ القبيلة الوحيد وسيد القوم .. اعرف كيف
أسوسهم .. ووين مصالحهم وما فيه مشاكل .

حسان : (في خبث) وهذا حق يا شيخ صوان
صوان : والبير يا حسان .. البير يوم ما يصير ميلكي .. ما فيه
مشاكل .. يوم ما أبيع ميته على الخلق وازيد ثراء وما فيه
مشاكل
حسان : البير برك .. وواقع في أرضك اللي ورثتها عن أخوك
مسلم
صوان : لكل صخر بيقول انه في ميراثه وانه من حقه
حسان : ظالم وغادر .. طماع يريد ياخذ حق مش حقه
صوان : (مشيرا إلى الراية السوداء) .. حفضل الراية السوداء
بيتي وبيناته لحد ما اصفي رجاله واحد واحد واقتله واستولي
على البئر .. (مشيرا إلى البئر) وما فيه مشاكل .. واستولي
على المشيخة وما فيه مشاكل . لكن أخبرت انه عامل
معاهدة مع المطاريد الغربية واشترى منهم سلاح .
حسان : ما فيه مشاكل ومعاك حسان زعيم المطاريد الشرقية ..
وكل سلاحنا ملك ايديك وطول ما أنت طوع أمري أنا
طوع أمرك

صوان : تسلم يا زعيم
حسان : لكن أريد منك وعد وعطية
صوان : تريد مال ؟ المال مالك خذ كل ما تريده من مال
حسان : المال ثمن السلاح .. لكن أريد وعد بزواجي من سالة بنتك
صوان : سيق ووعدتك وقلت سالة لك
حسان : الوعد طال والشوق في القلب قتال .. وأنا مشتاق لائتمام
زواجي منها
صوان : يوم ما أصير شيخ القبيلة كلها .. ويصير البير ملكي ..
تكون سالة زوجتك وما فيه مشاكل .
حسان : والبعيد مع حسان يصير قريب والرقاب تمون فدا عيونك
يا سالة
(تدخل المرأة العجوز وهي تتوكأ على عكاز)
العجوز : يا ترى وينك يا ولدي .. جاي بالخلة ولا بجمال محملة غلة
حسان : (في غضب) قبر يلمك ويتاوي رمتك يا بوز الغراب
صوان : الولية عقلها طافق .. هلت علينا من دروب ما ليها اثر ..
تدور على ولدها اللي تايه ومن يومها وهي تايهة بين
القبائل تنعق مثل اليوم وما فيه مشاكل .
العجوز : يا قبر كيف هان عليك تضمه .. وأنا الي قلبي عليه ما
ارتاح من همه .. (تخرج)

حسان : غوري قبر يلمك
 (يدخل شحات وهو يركب أحد عسف النخيل كحصان
 وممسكا بيده بسيف من خشب وهو يقول ويردد)
 شحات : أبوح يا أبوح .. بيت العرب مفتوح .. مفتوح بقاله سنين
 .. يا حصرة الملايين .. والبوم عشش فيه .. من السوس
 طايح سقفيه .. واقف عليه خفير .. يطرد العصافير .. خفير
 لابس طرطور .. من اليوم يا جوم ماجور .. وابوح يا ابوح
 .. بيت العرب مفتوح
 حسان : يوم اغبر .. هذا كمان شحات المهورس ..
 شحات : (مخاطبا حسان) كيفك يا دعروور .. تيجي اخذك لفسة
 على زيل حصاني
 حسان : قبر يلمك ويلم اصنافك يا اهيل ..
 شحات : ليه غضبان يا دعروور .. هذا حسان عربي اصيل .. لقيته
 تايه في الصحرا اويته وكبرته ..
 صوان : غور من اخني الحين يا شحات وما فيه مشاكل ..
 شحات : (لحسان) يا دعروور قول الحق انت راجل ولا لا
 حسان : (يمسك بشحات) والله غير اكسر لحملك في عضمك
 شحات : اه يا با اه ياماد
 صوان : اتركه يا حسان .. ما انت خابر ان عقله طاقق .. وما فيه
 مشاكل

شحات : اه ياباه .. كدة كرمشت جلبايي وانا كيه .. تحت خفف
الجميل

حسان : قلت غور من اهني

شحات : الله حي .. الشيخ مشاهد حي ..

حسان : الشيخ مشاهد .. الراجل هادا ما برتاح له .. انا ذاهب
الحين لحد ما يغور

صوان : هاشوفه ايش يريد واتبعك .. وما فيه مشاكل .

حسان : بس خللي بالك منه هدا راجل اعمه وحويط ..

صوان : لا تخاف على الشيخ صوان .. ما فيه مشاكل (يخرج
حسان)

شحات : الشيخ مشاهد جه .. تريك تريك تريك (سيرحل الشيخ
مشاهد

صوان : خير يا شيخ مشاهد .. ايش تريد ؟

مشاهد : كيف يا راجل يا عاقل .. انت واخوك تقسموا القبيلة ..
وتشتوا الخلق وتشعلوا نار النار والحرب بيناتكم .

صوان : اه - كده فيه مشاكل .. وانت ايش داخلك

مشاهد : دخلي ابي منكم .. والدم اللي بيجري في عروقي من
دمكم ويعز عليه ان الدم الواحد يسيل على الارض

صوان : انا شيخ القبيلة الوحيد .. والبير لي .. مهما سال الدم
وطال النار

مشاهد	: خسارة يا عربان .. عار عليكم .. لما راسكم يركبها الطمع .. وترخص عليكم دمانكم .. وين يا شيخ صوان .. وين واقفتنا رجالة يد واحدة ضد عدونا في ٦٧ و ٧٣
صوان	: الوقت اتغير والبقاء للاقوى
مشاهد	: صالح اخوك .. وبيننا نكون ايام ما كنا مع الشيخ مسلم اخوكم الكبير .. اللي كان زين وعقله زين .
صوان	: عقله طاقق والي فاسد .. واهو مقامه اللي مدفون تحت البير ههدمه وما فيه صلح مع صخر وما فيه مشاكل .
مشاهد	: وكيف تفتحوا بيوتكم وتستعينوا بالاغراب المطايرد .. اللي ما احنا خابرين اصلهم . هجامة وقطاع طرق .
صوان	: واستعين بالعقاريت الزرقا ما دام هذا صالحى ومافيه مشاكل
مشاهد	: لازم تكون خابر يا شيخ صوان .. ان المطايرد ما بيعنيهم غير مصالحهم
صوان	: انتهى الخراف .. واياك تتخرف معي في هذا الموضوع مرة تانية .. والا انت خابر ..
مشاهد	: هتقطع عني المعنونه اللي بتعطيها لي
صوان	: واقطع عنك الميه والزاد .. ما دمت ضد مصلحتي .. الزيم دارك يا اخي دانت اعمى

مشاهد : بتعابيرني يا صوان بعمامي وانت خابر ليه انا عميت .. اه ..
انا عميت عشان كنت بدافع عن وطني ضد الغاصب مش
جبان وقاعد جوه دارني مثل الحریم
صوان : انا مالي صالح .. وان عودت الخراف الخاسر ما هصير خير
وما فيه مشاكل

(يخرج)

مشاهد : (وهو خارج) ضاع الفارس والخيال
شحات : (داخلا) وهو يسير خلف الشيخ مشاهد مرردا) يا
مطرة رخي رخي على قرعة بنت اختي .. بنت اختي قرعة
قرعة .. ما فيها ولا شعرة وترید من العزة فروة والفسوة في
بلاد بعيدة .. وايش تعمل الماشة يا زينة في الوجه العكسر
الشينة .. وكيف ترفع يا ولد الراس .. والراس الواطي
منداس وبيا مطرة رخي رخي
(يخرج ويضاء الجانب الايسر من المسرح) (يدخل صخر
وعواد)

صخر : (منفعلا) وحد كتاب الله لاجعل وحوش البرية تسهش
لحمك يا صوان

عواد : اهدى يا شيخ صخر .. اهدى يا سيد القوم ..

صخر : قاتل رجلين من رجالي وتقولي اهدى .. كيف يا عواد
اهدى .. كيف ؟

عواد : وانا عواد زعيم المطاريد الغربية واقولك لا تحمل هم ..
قتلك راجلين اقبله اربعة .. لحد ما يجي يركع تحت قدمك
ويقولك سامحي يا شيخ القبيلة الوحيد يا سيد القوم ..

صخر : اريد مزيد من السلاح يا عواد ..

عواد : سلاح المطاريد الغربية كله ملك يدك

صخر : وفلوس صخر كلها ملك يدك

عواد : احنا يهمننا مصلحتك .. ويهمننا تثبت وجودك .. لانك
انت اصلح واحد يكون شيخ القبيلة كلها ويكون البير ملك
يده

صخر : صحيح يا عواد ..

عواد : صحيح يا سيد القوم ..

صخر : انا صخر وقلبي صخر ورجالي صخر وسلاحي صخر
وعقلي صخر .

عواد : وطول ما انت قوي .. الخلق هتهابك .. والمشيخة هتكون
لك والبير ملك لك .

صخر : اه يا عواد .. يوم ما املك البير واضمه للمكي .. يوم ما
اصير اغنى شيخ في القبائل كلها .. املك المال والجاه
والسلطان وتيجي القبائل التانية تعمل عندي خدم ..

عواد : بس اياك ما تنساش وتمد رجالي باليه .

صخر : لك ما تشاء من المال .. انت سندي ويدي اللي بتحرك
بيها وبيطش عدوي بيها .

عواد : وانا والمطاريد الغربية طوع امرك .. يا سيد القوم .. دا
طول ما انت طوع امرنا (يضحكان سويا) ثم يخرجان بينما
تدخل المرأة العجوز (

العجوز : يا طير يا طائر فوق السطوح .. فوت على ولدي نوح
شحات : (داخلا) الطوفان جاي يا عربان .. هيعزق الشايب
والولدان .. ادخلي يا سائلة الدار امان .. ما فيها غريان .. (

سائلة : كفاكي بكى وعديد يا خالة ..
العجوز : قلبي عليك يا ولدي انفطر وقلبك عليه ليش حجر ..
سائلة : يا ريت يا خالة يعود الغايب يا ريت . ما انا كمان يا خالة
قلبي حزين .. انتظر مجاهد وللحين ما عاد .. ما انا خابرة ان
كان مات ولا حي ..

شحات : مجاهد حي .. مجاهد حي ..
العجوز : بين العين يا ولدي ضمنتك .. وجوه كبدي يا ولدي
راعتك .. لكن ما رايتك (تخرج)

سائلة : انت خابر ولدها ؟ يا شحات
شحات : والله ما انا خابره .. لكن قولتلها خدي حصاني هادا
واجثي عنه .. لكن ما وافقت ..

سألة	: و ما خابر شيء عن مجاهد يا شحات
شحات	: مجاهد حي .. مجاهد حي
سألة	: سنين طويلة وهو غايب في معتقل العدو .. لا حس ولا
	خير .. كيف عرفت انه حي
شحات	: ما تعرفي اني من عيناى المعمصة اقدر اعرف كل اسراري
	.. ومن عيناك الجميلتان اقدر اعرف كل اسرارك .
سألة	: مزاح انت يا شحات ..
شحات	: لا يا سألة انا ما مزاح .. قلبي دلني ان مجاهد حي .. لكن
	انت باقية على عهده معك
سألة	: ابوة يا شحات .. مجاهد طول عمره راجل ولا كل الرجال
	.. طول عمره يعيش الارض والناس ويكره الظلم .
شحات	: صح و الله صح .. كان دائما يدافع عني .. لما يضربني
	الطنيات .. ويقول ليهم .. اتركوا شحات اياكم حدا يمد
	يده عليه .. اقوم انا انفخ نفسي .. واقول للولد غورا من
	اهني لحسن اضربكم بالمركوب وبعد ما يمشي مجاهد اطلع
	اجري وهما يجروا ورايا ويحذفوني بالطوب .
سألة	: نبيل الاخلاق .. كريم الطباع ..
شحات	: أي نعم .. واول ما احتل العدو ارضنا كان اول واحد
	يحمل سلاح ويجاهد مع ابوه الشيخ مسلم ورجاله .
سألة	: طول عمره راجل

شحات	: من شان هادا بتهويه يا سالة
سالة	: وكيف ما اهواه .. لو قطعوا جسدي ما اقدر اخون عهده
شحات	: ودعروور ؟
سالة	: ماله حسان ؟
شحات	: يريدك زوجة له
سالة	: يريد الموت ولا يريدني
شحات	: يعني ما تريديه
سالة	: ما اريده
شحات	: ما دام ما تريديه .. لو هوب ناحيتك .. قولي لي وانا اطخه بالنبلة هادي واخرم عينه بالسيف هادا .. واحمله على حصاني العربي الاصيل هادا وارميه في البير
حسان	: (داخلا) ترمي مين في البير يا اهطل
شحات	: (مضطربا) دعر.. ور .. قصدي حس .. ان .. ارمي الديب
حسان	: ديب ياكل رمتك يا عفن
شحات	: عفن كيف وانا متحمي على العيد اللي فات واللي قبل اللي فات
حسان	: غور من اهني لاتاوي رمتك

شحات : حاضر .. لا تغضب (وهو خارجا) يا دعوور قول الحق
 انت راجل ولا لا (يخرج ثم يدخل مرة اخرى) ان زعلك
 قلبي لي وانا اكسر لحمه في عظمه (يخرج)
 حسان : غور ياهطل (لسالة) كيفك يا زينة الصبايا
 سالة : ايش تريد يا حسان اغرب عن وجهي
 حسان : بكرة البعيد يقرب .. وتجمعنا ورقة واحدة ودار واحدة
 سالة : نجوم السما اقرب لك
 حسان : نجوم السما طوع امر حسان .. انا قادر اخطفك .. لكني
 اريدك طايعة
 سالة : يكون يوم موّي
 حسان : افهميني يا سالة .. لا تتمسكي بامل كاذب .. انا خاير
 انك بتنتظري مجاهد .. مجاهد مات ..
 سالة : مجاهد عايش .. وعمره ما مات ..
 حسان : وعرفت من وين ؟
 سالة : قلبي يدلني
 حسان : وفرضنا انه عايش .. لما يعود .. حيقدر يحميكي ؟ حيعود
 فاقد ماله وهيبته وشبابه وتايه .. ما هيعرف له راس من
 رجلين .. لكن انا اقدر اتاقلك بالذهب لان الوقت وقت
 الاقوى وانا الاقوى .. اللي يقدر يحميكي ويشعرك بالامان

سالمه : ياه .. ما يقدر بحمي الدار غير اصحابها .. وانت طريد ..
قاطع طريق
حسان : (بعصية) اسمعي يا سالمه .. هتكوني ملكي مهما طال
الزمن .. يا زوجة يا غصية
شحات : (يخرج من مجناه) يا دعرور طوف وشوف انت جبان او
مكسوف .
حسان : انت لسة هنا ياهطل .. هاتوا يا رجال (يشير الى رجاله
بامساك شحات)
(يحاول شحات ان يركب عسف النخيل .. ويهرب لكن
الرجال يمسكوه)
شحات : الله لا يكسبك من حصان عربي هامل .. ليش ما سرعت
.. عجزت يا خيان
حسان : مدوه يا رجالة .. (يضربه بالخيزرانة على قدميه)
شحات : اه يابا .. اه يا قديمي .. حرمت يا حسان
سالمه : اتركه .. اتركه يا حسان ..
حسان : امرك يا سالمه .. لكن اسمع ياهطل لو يوم شفتك هوبست
ناحية سالمه هيكون يوم حتفك
شحات : وينك يا مجاهد ترد لي لحمي اللي اتبعتر ..

حسان	: مجاهد مات وشيع موت .. مجاهد ما بقاش عايش غير في عقولكم المعتمة .. وانا حي انا حسان زعيم المطاريد الشرقية ما حدا يقدر يقف قدامي .. او يعصي امري (يخرج)
موال	: (غناء) لك يوم يا ظالم لك يوم .. مهما زدت المظالم لك يوم .. هتثور عليك القوة والعدل والميزان .. وتدمرك من جوه كرامة الانسان
سالة	: قوم يا شحات .. لا تبكي
شحات	: وايش يفيد البكا يا سالة من بعد ما ولا الرجال ..
سالة	: احنا اللي فتحنا دارنا للمطاريد وخليناهم يتحكموا فينا .. كله من ابويا وعمي
مشاهد	: (داخلا) ضاع الفارس والخيال .. بمجرد ان يلمح شحات يجري عليه)
شحات	: الحفني يا شيخ مشاهد .. اه يابا .. دعروور كسر لحمي في عضمي .. شوشو لي قدمي
سالة	: خاطرك يا عم الشيخ مشاهد
مشاهد	: انت هنا يا سالة .. كيفك يا بنتي
سالة	: عايشة يا عم الشيخ (يخرج)
مشاهد	: قلبها مكسور يا ولداه .. لكن قولي ليش ضربك حسان يا شحات

شحات	: اغضب سائلة .. حمى الدم العربي في عروقي .. طقت من عيوني الشهامة العربية .. ركبت حصاني وقلت ابارزه .. لكن حصاني صار هامل ما قادر على السير واتاري سيفي كمان اكله الصدا وانا ما داري
مشاهد	: ومين فينا سيفه ما صدا من بعد ما صار يحمي الاغراب ..
شحات	: اه يا قدمي .. وينك يا مجاهد
مشاهد	: مسير الغايب يعود . طول عمره هو وابوه يكره المطايرد .. ويحذروا الخلق منهم لحد ما وقعوه في شباكهم ورموه في يد عدو لا يرحم ..
شحات	: اه يا شيخ مشاهد .. لو كان مجاهد موجود ..
مشاهد	: سنين طويلة واخباره مقطوعة
شحات	: انا قلبي يدلني ان المطايرد ورا اختفاء مجاهد
العجوز	: (داخله) ويوم تعود يا ولدي .. يوم القلب يرتاح .. يوم تعود يا ولدي .. يوم اقيم السامر والافراح (تخرج)
شحات	: والله بفكر اركب حصاني الهامل هادا وابحث ليها عن ولدها .. اه يا قدمي ما انت سعناني .. (فجأة يصاب بصاعقة) الحق يا شيخ مشاهد
مشاهد	: ايش فيه يا شحات .. حسان عاد ..
شحات	: انا ما مصدق عينا المعصات . اقرصني حتى اعلم اني صحيان ما نيمان

مشاهد	: ايش صابك يا ولد يا شحات .. ايش فيه
شحات	: مجاهد عاد ..
مشاهد	: انت بتخرف يا شحات ؟
شحات	: وراس ابويا ما بخرف (يدخل مجاهد)
مجاهد	: انا بلحمي وشحمي يا راجل يا عجوز ..
موال	: (غناء) ضميني ياما ضميني واقلعي توبك الحزين ..
	وضميني ياما ضميني وداري جراح السنين
مجاهد	: انا مجاهد يا شيخ مشاهد
مشاهد	: صوته .. مجاهد ولدي .. ضمني يا ولدي .. ضمني ارتاح
	على صدرك .. خليني انسى همومي واحمي عار الزمان ..
شحات	: وانا اعيطني .. قصدي افعصني .. يا حيرة بالك يا شحات
	.. اقولك اعتقني مثل الشيخ مشاهد .. عشان ارتاح فوق
	كتفك .. (يلقي بنفسه على كتفه)
مجاهد	: كيفك يا شيخ مشاهد .. كيفك يا شحات
مشاهد	: خير يا ولدي ..
شحات	: اقله على دعرور
مشاهد	: بعدين يا شحات .. مجاهد لسه واصل من غربة طويلة ..
شحات	: معك حق .. انا مضطر ابشر سالة .. قدامي يا حصاني يا
	هامل (يخرج)
مشاهد	: متى عدت من غربتك والمعتقل يا ولدي

مجاهد	: البارحة ..
مشاهد	: من غير حس ولا خير ..
مجاهد	: مانت عارف ان الطرق مقطوعة بينا وبينكم وما حدا يقدر يوصلكم او يوصلنا حتى انا ما كنت خابر وين ..
مشاهد	: كاد يضيع الامل في عودتك
مجاهد	: مجاهد يتحمل كل العذاب منشان يعود للاهل والاجباب
..	
مشاهد	: الاهل والاجباب ..
مجاهد	: خير يا شيخ مشاهد .. لهجتك فيها حزن ..
مشاهد	: بعدين احكيك يا ولدي
مجاهد	: لا احكيك الحين .. فيه حاجة غريبة .. من اول ما عدت وانا مش فاهمها .. اول حاجة يا شيخ مشاهد ما حدا اتعرف علي غيركم .. زي ما اكون غريب عن اهل القبيلة .. وكل ما واحد يشوفني وانه عليه .. يشوفني ويتركني ويسهر ب . وايه الراية السودا المرفوعة هادي وليش الخلق حامله السلاح .. وليش النساء لابسة السواد .. ايش فيه يا شيخ مشاهد ايش اللي صار ..
مشاهد	: الحال اتبدل يا ولدي ..
مجاهد	: اتبدل كيف ..
مشاهد	: اتبدل للاطماع والتار والصحة اتفرقت .

مجاهد	: نورني يا شيخ مشاهد .. قوللي الحقيقة
مشاهد	: الحقيقة مرة يا ولدي ..
مجاهد	: مش امر من ليالي المعتقل
مشاهد	: الدم في العرق الواحد صار مهدور ..
مجاهد	: ومين اللي هدره يا شيخ مشاهد .
مشاهد	: اعمامك قسموا القبيلة بيناهم ..
مجاهد	: قسموا القبيلة .. ووين ابويا ..
مشاهد	: مات بعد ما دخلت المعتقل .. مات وهو قلبه حزين عليك
..	
مجاهد	: (في تاتير) ابويا مات ..
مشاهد	: ومقامه تحت البير هادا .. ووصاني قبل ما يموت ادفنه تحت البير
مجاهد	: واعمامي ؟ ايش اللي عملوه بعد ابويا ؟
مشاهد	: كل واحد فيهم .. اراد تكون المشيخة من نصيبه ويكسون البير ملكه .. منشان هادا اشعلوا نار التار بيناهم ..
مجاهد	: وبير الميه ..
مشاهد	: اتحول بحور من الدم ..
مجاهد	: وانت وين يا شيخ مشاهد ؟
مشاهد	: انا بقيت ماضي ما له تاتير ومالي كلمة الكل استكبرني
مجاهد	: وزمايل الجهاد وين اراضيههم ؟

مشاهد : اللي اصابته عجزته ولزم داره .. واللي بيتنظر المسوت ..
واللي سافر بره يشتغل في بلاد البترول .. واللي اتغلب على
امره واشتغل مع عمالك يحرق ارضهم واللي ترك القبيلة
ورحل ما نعرف وين اراضيه ..

مجاهد : ونضالنا وجهادنا ؟ وسنين عمري اللي ضاعت في المعتقل ؟

مشاهد : الخلق نسيونا يا مجاهد ..

مجاهد : وسالة يا شيخ مشاهد ..

مشاهد : عمك وهبها للمطاريد ..

مجاهد : المطاريد ؟

مشاهد : اعمالك استعانوا بيهم ضد بعض .. واشتروا سلاحهم
وفتحوا لهم بيوتهم .. ياما غلبت فيهم ابصرهم لكن ما حدا
سمع كلامي

مجاهد : سنين وايام وانا بحلم بعودتي لاهلي وناسي وارضى ..
منشان امسك الفاس وازرع بطن الارض .. تطرح زرع
اخضر .. واجعل البير لكل الخلق .. راسم فرحتي قدامي
ويوم ما اعود القى الخصومة والتار والفرقة بين اهلي والقى
الغرب بيتحكموا في دمنا .. وخطيتي معهود للمطاريد .. يل
ريت ما عدت يا شيخ مشاهد

العجوز : قلبي عليك يا ولدي .. شايقة طريقك مسدود .. حواليك
الديابة يا ولدي والديابة اسود ..

مجاهد	: مين المعجوز هادي يا شيخ مشاهد ؟
مشاهد	: هلت علينا تسال عن وليدها ؟
مجاهد	: وين ولدها ؟
مشاهد	: ما حدا خاير .. اللي يقول بلمه حوت .. واللي يقول قتله ديب .. واللي يقول وقع في الجب .
مجاهد	: (للمعجوز) ردي عليه يا خالة .. خبريني وين ولدك
المعجوز	: يا طير يا ابو جناح مكسور لف على ولدي ودور ..
مشاهد	: لا تتعب نفسك يا ولدي ما حدا قدر يخليها تتكلم .. الظاهر انها ما تسمع وما تشوف .
المعجوز	: بيعت لك مكتوب من قلب لقلب .. رد السلام يا ولدي وخبرني وين الدرب
مجاهد	: تاه منك كيف خبريني يمكن اقدر اساعدك ..
المعجوز	: لو كان ليه عليك دليل يهديني .. لمشيت لبك ارض تشيلني وبحر يداريني (تخرج)
مجاهد	: ايه اللي صار يا شيخ مشاهد .. ايه اللي غير الخلق ..
مشاهد	: المطايرد .. اللي اغوا الناس ..
شحات	: (داخلا) مجاهد حي يا سالة .. مجاهد حي ..
سالة	: (تدخل سالة) مجاهد
مجاهد	: سالة :
سالة	: عدت يا مجاهد

مجاهد	: عدت الليالي والايام عشان اعود ليك يا سالة
سالة	: وانا احصيت الدقائق والثواني انتظرك يا مجاهد
مجاهد	: لكن الجرح في قلبي صار جرحين
سالة	: كل جراحك ان اوامها تطيب
مجاهد	: لقيتك معهوده للمطاريد
سالة	: صابنة عرضي وطهري لك وما حدا صاب قلبي ..
شحات	: يا عيونك المعصية يا شحات مثل البندورة
سالة	: اتذكر يا مجاهد .. يوم ما صابتك رصاصة في قدمك م العدو .. يومها فضلت جنبك طول الليل ادوي جرحك وادعي ربنا انه يشفيك ..
مجاهد	: وادي النتيجة .. بقيت ماضي .. والانسداد اتحكموا في الخلق
سالة	: بينا يا مجاهد .. اتذكر الاغاني والسامر والميجانا .. وانتوا قاعدين في الليل تنتظرو تنفيذ العملية ضد العدو) (يبدأ الاغاني بمقطوعات من الميجانا ثم اغاني وطنية كما لو كان حلم او فلاش باك)
مجاهد	: اتذكر يا سالة وعمرى ما نسي
مشاهد	: طول عمرك راجل يا مجاهد ..
مجاهد	: خلاص يا شيخ مشاهد خلاص يا سالة .. مجاهد عاد منشان يجاهد من جديد .. هلف على اعمامي على مشايخ

القبائل على الخلق كلهم .. هبدأ نضالي ضد المطايرد .. ضد
كل دخيل بيحاول يكسر في عاداتنا او يحاول يمحي هويتنا
واصالتنا او يلغي تاريخنا ونضالنا

: وانا هخوذلك عوينات دعرور بالسيف المصدي هادا حق
يصبر اعور .

(يخرج الجميع بينما تدخل المرأة العجوز وتقف وحدها على
المسرح وهي تردد : قلبي عليك يا ولدي .. يا خوفي مسن
اخر الطريق .. قلبي عليك يا ولدي .. قلبي عليك يا غريب

شحات

(المشهد الثاني)

تقوم القبيلتين قبيلة على عین المسرح قبيلة الصواوين وعلى
يسار المسرح قبيلة الصخران وتقوم كل قبيلة برجم القبر
الموضوع بجوار البير بالخصى وهي تردد

الصواوين: ملعون يا هالوالي ملعون

الصخران : ملعون يا هالوالي ملعون

مجاهد : (وهو يقف بين القبيلتين) ليش بتلعنوه يا خلق ..

صوان : والي فاسد

صخر : والي خداع

مجاهد : مانتوا كنتوا بتهابوه وتعملولو الف حساب قبل ما يموت

وكلامه يمشي على كل واحد فيكم ..

صوان : خدعنا بكلامه المامل

صخر : جيان .. علمنا الخزي والعار ..

مجاهد : حاكم من الاغراب

صوان : معاود ليش يا غريب ايش تريد

صخر : اياك طمعان باهل ومال

مجاهد : جاي فارد توي الابيض

صوان : انت مين .. ومن وين اراضيك ؟

صخر : ووين اصلك ؟

مجاهد : انا مجاهد ولد اخوكم ووليكم ..

صخر	: مين اللي غواك يا غريب انك تكون مجاهد ولد اخونا ؟
صوان	: مجاهد مات وشيع موت من سنين طويلة
صخر	: واحنا كفناه بيدنا ودفناه تحت التراب
مجاهد	: ومين قتله ؟
صوان	: لا تلف وتدور .. قول ايش تريد .. وما فيه مشاكل
مجاهد	: اريدكم تحقنوا دماء القوم وتكفوا عن الحرب .. والبير يعود لكل الخلق .. للفقير والغني .. يروي ارضهم وعطشاهم . فاكرين يا عم .. يوم ما حفرنا البير كان ليش .. كان عشان يروي عطش جنودنا ورجالنا وناسنا .. لا عشان يروي عطش الاغراب . ليش يا عم حولتوا ميتة بحور دم وزرعتوا الارض الطاهرة جثث وضحايا .. بينا يا عم نقعد في مجلس عرف يحضروا الاهل والاصحاب ونحل مشاكلنا بينا وما ندخل غريب بيناتنا .. الغرب يا عم ما يحلوا مشاكل بيزيدوا نارها
صخر	: لا مصالحة حتى اكون انا شيخ القبيلة الوحيد والبير ملكي
صوان	: لا انا شيخ القبيلة الوحيد وما فيه مشاكل
مجاهد	: القوم هما اللي من حقهم يختاروا شيخهم ويختاروا مصرهم
صخر	: انا احق بالمشيخة
صوان	: و الله ما تنالها حتى يوضع مجرى الطعام في الخلق وما فيه مشاكل

صخر : وانت ما تنولها حتى يدخل البعير في المخيط
مجاهد : يا خلق كفاية خلاف لا تشمتا الغرب فيكم ..
حسان : تقصد مين بالغرب يا غريب
مجاهد : اقصدكوا انتوا .. انت وعواد
عواد : هادي اهانة لا اقبلها يا شيخ صوان
صوان : اسمع يا ولد .. اياك تنطق كلمة مرة ثانية .. اياك توجه
اهانة للمطاريد .. هادول سند لي ومن غيرهم فيه مشاكل
مجاهد : هادول من مصلحتهم تفضل الراية السوداء دايرة بيناتكم
صوان : الراية السوداء دايمة طول ما صخر راكب راسه وما فيـه
مشاكل
صخر : اتنازل انت عن المشيخة والبير وانا انزل من راسي
مجاهد : يا خلق اسمعوني .. زمان كنتم يد واحدة وقلب واحد ..
كنا مثل خيل مداعيق .. تدوس عدونا .. انت يا عم صخر
كنت حارس البير ليل ونهار من العدو .. وانت يا عم صوان
كنت توزع ميتة بيدك على الخلق .. ايش اللي صار يا
عماه .. ايش اللي غيركم .. مين نساكم تاريتحكم
وامجادكم .. واويتهم المطاريد وانتوا خابرين انهم طول عمرهم
جواسيس علينا .. يكرهونا ويكرهوا راحتنا ..
حسان : لا .. هادي اهانة لا تغتفر

مجاهد	: لازم تكونوا خابرين ان المطايرد من صالحهم الحرب تكون دايرة بيناتكم
عواد	: عاجبك كدة يا شيخ صخر الكلام الهامل هادا ..
صخر	: اسمع يا ولد يا مجنون انت .. الظاهر انك فلسان وتريد تبيع بضاعة باينة فات ميعادها
حسان	: والحيل ما تحمل دناتير ..
صخر	: الظاهر ان ليالي المعتقل اللي هيقولوا عليها اصابته بالجنون
حسان	: وامنيته يسوق الخلق في طريقه
عواد	: رب امنية جلبت منية
صوان	: ايش اللي يخلينا نسمع كلام ولد هامل زي هادا ..
صخر	: انا ما جيت اسمعه انا جيت احذرك
صوان	: انت تحذرنى يا صخر
صخر	: قتلت راجلين من رجالي هقتل لك اربعة
صوان	: وانا هقتل لك ستة
مجاهد	: (صارخا) يا خلق .. اسمعوني انا ما مجنون ولا مجبول
صوان	: اسمع يا ولد .. انا طولت بالي عليك ولكن وحد كتاب الله ان ما تكف عن هذا الخراف هاهدر دمك وما فيه مشاكل
صخر	: وتصير مهدور الدم بين القوم
مشاهد	: قلبهم صار حجر .. السلطة والطمع وحسب الجاه .. عماهم عن الحقيقة .. عماهم حتى عن اقرب الناس ليهم

حسان	: يوه .. ماعدش غير الاعمى كمان ..
مشاهد	: بتعيرني بعماي .. عماي ما هو من يوم ما صابتي رصاصة العدو عماي الحقيقي يوم ما لقيتكم بتسوقوا مشايخ القبيل مثل الابل
صوان	: اقفل خاشمك يا مشاهد والا انت خابر وما فيه مشاكل .
مشاهد	: هتمنع عني المعونة اللي بتعطيها لي .. خلاص يا صوان .. معونة مغمسة بدم الخلق ما اريدها
نسيم	: من الغريب هادي يا سيدي صوان ؟
سلامة	: (من رجال صخر) الظاهر انه مجنون مثل ما قال سيدي صخر
شاب	: اقتلوه
شاب	: يبحوا دمه
مشاهد	: يا خسارة يا شباب العرب .. نسيوا مجاهد اللسي على راسكم .. مجاهد الي ضحى بزهرة شباهه علشان يعيش غيره .. مجاهد هادا يا نسيم .. رمى نفسه في يد العدو علشان المرحوم ابوك يهرب منهم
شاب	: هادا كلام فارغ
شاب	: يريد الاعمى يفسد عقول الشباب
شاب	: يريد يطمس الحقيقة
شاب	: هادا غريب ما بنعرفه

نسيم	: احنا بندافع عن شيخنا .. عن شيخ قبيلتنا
مشاهد	: ضد مين .. ضد اهلكم واخوانكم .. صرتم اعداء .. ما تنكلم يا مجاهد .. ولا خلاص صابك الياس
مجاهد	: (في ياس) .. اتكلم اقول ايه يا شيخ مشاهد .. ما حدش فيهم راضي يسمعي نضالنا وجهادنا كان وهم .. تربسدي اقول اني ضليت الطريق وما لقيت اهلي وعشيرتي .. اقول انهم باعوا خطيبي سالة للمطاريد بأرخص ثمن
حسان	: ايه .. خطيتك .. مش بقولكم مجنون
صوان	: اسمع .. اياك تتخرف بكلمة تانية او تذكر اسم سالة
مجاهد	: سالة خطيبي وانت خابر يا عم
حسان	: يادي الفضيحة .. غريب وتحدث باسم الطاهرة
مجاهد	: الطاهرة اللي تريد تقتصبها يا جبان
نسيم	: وبعدين في الغريب هادا . نقتله يا سيد القوم
مجاهد	: نسيم .. انت ولد الشيخ سويلم .. الله يرحم ابوك كان راجل ولا كل الرجال .. صدقني يا ولدي ابوك كان يريدك راجل تحمل الفاس وتزرع ارضه ما تسمعش كلام المطاريد يا ولدي .
حسان	: اسمع يا غريب الدار والاصل
مجاهد	: انا اللي غريب الاصل .. يابن الافعى

حسان	: لو تفوهت بكلمة .. واعدت اهانة المطايرد .. السيف حكم بيني وبينك
مشاهد	: بارزه يا مجاهد .. بارزه .. انت طول عمرك تجيد المبارزة .
مجاهد	: اريد سيف
مشاهد	: خذ هادا سيفك .. شايلهولك ليوم زي دة (يقوم مجاهد بمبارزة حسان وعندما يهيم ان يهزمه تدخل المرأة العجوز)
العجوز	: وينك يا ولدي .. يا خوفي من طعنة الغدر في الظهر لما تخون .. تقطع في الحشا والدم في العروق يهون .. (تخرج)
مجاهد	: نفدت يا جبان
عواد	: والله دي مهزلة يا مشايخ القبائل .. عيب عليكم لما ننهان قدامكم وانتوا واقفين تنفرجوا .
حسان	: ان ما تردت لي كرامتي يا شيخ صوان .. يصير فراق بيني وبينك
مجاهد	: اتركهم .. اتركهم يرحلوا من اهني يا عم .. وتعالى نقعد ونحل مشاكلنا بينا
صوان	: اسمع يا ولد يا مجنون انت .. المطايرد هادول اسيادك وتاج راسك

صخر : ايوه تاج راسك .. اما انت يا صوان فالراية السودا قايمعة
بيناتنا حتى يعود الحق لصاحبه .. وخذ حذرك قتلت لي
رجلين .. قدامهم اربع رجال من رجالك .

صوان : لو سولت ليك نفسك بقتل راجل واحد قدامه ستة .. امد
انت يا ولد .. غور من اهني .. دمك مهدور .. تاخذ
بعضك وتترك القبائل كلها

مجاهد : اريد خطيبي سالة

حسان : بطل كلام لا جايب ولا مودي .. سالة خطيبتك من ويسن
.. انت اجعر راجع تقول ليك اهل وخطية

صوان : كان عهد خرف .. وانتهى الخراف يالا ارحل من القبيلة
كلها

مشاهد : تريدوا تطردوه منشان يريد السلام والصلح بينكم

صخر : هامل وكلامه هامل مثله وانت هامل مثله

صوان : يريد يفسد شبابنا وعاداتنا

مشاهد : يعني هو اللي يريد يفسد عاداتكم .. انتم كده اللي يقف
قدامكم او يعارضكم يصير عدوكم .. وتيحوا دمه يا
تطردوه .. وما دام الحكاية حصلت لطرده واهدار دمه ..
يبقى اسمع منك له .. البير من حق مجاهد .. هو اللي ضحى
بنفسه ويستحقه

صوان : حتى الاعمى صابة الجنون

مشاهد : لا الاعمى ما صابه الجنون .. الاعمى على حق .. وهلدي
الحجة الاصلية للبر بيع وشرا مجاهد والشرط ان يجعله سبيل
لكل الخلق .. من ناسه واهل بلده .. ابوه كتبه قبل ما يموت

صوان : وين مجاهد ؟

مشاهد : مجاهد اللي واقف قدامكم

حسان : شفته كيف ؟

مشاهد : شفته بقلبي

صوان : مجاهد مات

مشاهد : تلحسوا البشعة ان مجاهد مات وان هذا ما هو مجاهد ولد
اخوكم تلحس البشعة يا مجاهد انك مجاهد ولد مسلم

مجاهد : انا مستعد اعمل أي شيء

صخر : خدعتنا يا عمى

صوان : غشيتنا يا عمى .. حسان (على انفراد) اريد دم الاعمى
ومجاهد

حسان : اترث ثوية يا شيخ صوان

صخر : عواد .. اريد دم الاعمى

عواد : الوقت ما هو مناسب

صوان : مصر الحى يشوف الحى .. وما فيه مشاكل

صخر : الراس ما بتساع طربوشين .. يالا يا عواد
(يخرج الجميع فيما عدا مجاهد ومشاهد)

العجوز : قلبي عليك يا ولدي يا غريب وسط الصحاب .. لحمك
 المر يحلى لما تلوكة اسنان الديابة (تخرج)

شحات : الطوفان جاي يا عربان هيغرب الشباب والولدان .. الله
 يمسيكم بالخير ايش مالكم .. الحزن مالي وجوهكم .. اياك
 يكون الدعور اغضبكم .. قولولي وانا اطق عينه بالنبله
 هادي .. واضربه بالبرطوشه هادي (يخلع الصندل) تاخذوا
 زر بندورة .. ما تريدوا .. اسمعوا تاخذوا الفار المشوي هادا
 .. ايش مالكو اتخرستوا .. خابرين ايش حكاية الفار هادا ..
 اول ما رايت في الجحر اتخيلته راس دعرور .. وذيله عواد ..
 وصرت اراقبه وارقبه لحد ما طل براسه من الجحر وهب ..
 هويت عليه بالسيف هادا .. كسرت راسه ولميت الحطاب
 وشيوته وحملته على حصاني واحضرته .. ايش قولكم اننا
 شجاع .. ياباه طعمه مر .. علقم ... انا ذاهب اشرب علي
 لبن ماعز يا عقلك يا شحات .. وهو وين حليب الماعز ..
 اذا كانت العزة بطلت تخلف (يركب حصانه) وتريح تريح
 .. وطاق طاق شامية .. ومعلق في الشامية وطاق طاق طاقية
 .. ويا خبيتي على الوحدة العربية (يخرج)

مشاهد : وبعدين ناوي تعمل ايه يا مجاهد .. والبير الحنين صار
 ملكك

مجاهد : والله مانا خابر يا شيخ مشاهد

- مشاهد : اجمع شباب القبيلة حواليك .. واطرد المطاريد .. واقصف
قدام عمالك
- مجاهد : اه يا شيخ مجاهد لو عملت كدة .. ابقى بقسم القبيلة
تلات .. ابقى بزيد نار الحرب .. انا اريد يسود الحب ويتلم
الشميل
- مشاهد : امال ناوي تعمل ايش .. دا انا كنت فاكر ان المشكلة
اتحلت .
- مجاهد : ما فيه غير حل واحد
- مشاهد : ايش هو
- مجاهد : نكسر راس الافعى
- مشاهد : قصدك المطاريد .. كيف ؟
- مجاهد : اساوهمهم
- مشاهد : ايش الكلام اللي بتقوله هادا يا مجاهد .. تساوم المطاريد
- مجاهد : افهمني بس يا عم الشيخ مشاهد .. انا هلعب عليهم
ملعوب .. الوح ليهم باني اريد اتعاون معاهم .. على ان
يتركوا مشايخ القبائل .. وبعدين افضحهم قدام الخلق
- مشاهد : لا يا ولدي المطاريد اولاد افاعي .. نايم ازرق .. طابعهم
الغدر .. لو كشفوا ملعوبك ما هيصير خير
- مجاهد : هكون صاحي ليهم
- مشاهد : وكيف ناوي تساومهم ؟

مجاهد	: هروح ليهم في عقر دارهم .. في الجبل واقولهم اريد سلام معكم وتعاون واديكم نصيب من مية البير ..
مشاهد	: تروح ليهم في عقر دارهم .. وتحط يدك في يدهم ..
مجاهد	: الحين مافضح مؤامرتم ..
مشاهد	: الامر لله
مجاهد	: بس هادا يصير سر بيني وبينك وبين الشحات
مشاهد	: وليش شحات
مجاهد	: منشان هاخده معي
مشاهد	: انا رايع الحين لداري .. اقعد جواها .. وارقب النهاية ..
العجوز	: (داخله) يغور الشين يا ولدي لو كان بينا يغور الشين يا ولدي لو كان بينا
شحات	: والطوفان جاي يا عربان .. يغرق الشباب والولدان
مجاهد	: شحات .. طوفان ايش يا شحات .. احكي لي ايش حكاية الطوفان هادي
شحات	: حلم .. حلمت حلم ما انساه .. (اضاءة توحى بالحلم) قال ايش لقيت بحرين اطبقوا على الخلق .. بحر ميته بيضه وبحر ميته سوده .. ونجمة بست سنون وعينان تلقي على الخلف بشهب .. وانا اجري اجري .. والطوفان ورايا اسرع من اليرق .. اهرب من الطوفان القسى الشهب ..

اهرب من الشهب القى الطوفان وفجأة لقيت وسط الطوفان
شابة مليحة عليها قبة او تاج من ذهب تلوح لي من بعيد ..
وما كذبت خير .. عدت عليها وصرت ابوس فيها وهب
صحيت من النوم لقيت نفسي حاضن حصاني الهامل هادا ..
احكي الحلم للخلق ما حدا مصدقي .. ويقول لي انت هامل
واحلامك هاملة

مجاهد	: تلقاك كنت واكل اكلة ثقيلة
شحات	: انت كمان ما مصدقي يا مجاهد .. الطوفان جاي يا مجاهد
	منشان هادا ودي اصنع لي مركب من القش حتى انجو من الغرق
نسيم	: (داخلا) عمي مجاهد
مجاهد	: نسيم خير يا نسيم يا ولدي - جاي تقتلني
شحات	: ايش الطوفان جد يا ولد يا نسيم
نسيم	: لا يا عم مجاهد .. ما اريد احارب حدا
مجاهد	: صحيح يا نسيم ؟
نسيم	: كلامك فوقني .. ونور طريقي .. معك حق .. اهملت ارض ابوي وجدي وقتلت اعز الناس لي .. بس انا خايف من عمي صوان ومن المطايرد
مجاهد	: لا تخاف يا نسيم .. طول ما انت على حق ما تخاف
شحات	: زين كلامك والله زين يا نور العين ..

نسيم : احمي الشباب يا عم من المطايرد .. المطايرد يريدوا يقتلوا
شبابنا بالحروب والسموم والمخدرات
مجاهد : لا تحمل هم يا نسيم - لا تحمل هم .. روح الحين اقعد في
ارضك .. ازرعها ولا تغادرها حتى اعود اليك ولو اردت
أي شيء تعالى عندي
نسيم : امرك يا عم (يخرج)
مجاهد : اما انت فتعالى معي
شحات : لوين ؟
مجاهد : لبداية الطريق

(المشهد الثالث)

(هذا المشهد يجب ان يدور في طقس يوحي بالمؤامرة بحيث تكون الاضاءة

خافتة على ضوء فانوس (يدخل حسان وعواد)

حسان : اسمعني مليح يا عواد .. وانصت لي اذنك

عواد : سامعك يا حسان

حسان : الوضع الحين اتغير .. وانقلبت الاوضاع .. منشان كده

ودنا نغير من طريقة لعبتنا

عواد : تغير كيف ؟

حسان : انت خابر الحين ان البير صار ملك مجاهد

عواد : ايوه خابر ومن بيعتها وانا قلبي مولع نار

حسان : واحنا كل اللي يهمننا البير

عواد : صحيح

حسان : وان الخلاف يفضل داير بين مشايخ القبيلة .. عشان نكون

احنا الاقوى

عواد : صح :

حسان : وبعد كده نأمن وجودنا في القبيلة كلها

عواد : صح .. لكن وضح لي اكرر

حسان : لو تركنا مجاهد يستولي على البئر يبقى شوكته هتكبر
وهيلم الخلق حواليه ومش بعيد يصالح اعمامه على بعض
عواد : طب ما نقتله ونخلص منه
حسان : لا قتله الحين مش في صالحنا
عواد : امال هتسوي ايش وياه
حسان : احنا نفهمه ان احنا نعمل معاه معاهدة اتفاق
عواد : ونترك مشايخ القبيلة
حسان : نتركهم كيف .. احنا نكيد له عندهم ونلعب على
الجانبين
عواد : بس انت خابر مجاهد ما هو سهل
حسان : مجاهد مثل غيره من مشايخ العرب ما يهمه غير مصلحته
عواد : ومشايخ القبائل لو عرفوا ؟
حسان : وهيعرفوا من وين .. وحتى لو عرفوا .. نقول لهم ان احنا
بنلعب عليه مشان نستولي منه على الحجة وطول ما الخراع
داير بينهم ما هيقدرروا يستغنوا عن حمايتنا
عواد : طب وكيف نساوم مجاهد ؟
حسان : عن طريق سائلة .. هاقوله هاتركلك سائلة .. قلبي رق
للعشق اللي بينك وبينها وبكده هيامن لي
عواد : تفتكر يا حسان
حسان : العشق نار وما يطفئها غير احضان المحبوب

عواد : طب وبعدين ايش تسوي ثاني
حسان : نكيد له عند مشايخ القبيلة حتى يتامروا على قتله ونظفروا
ليهم بانه عدوهم اللدود .. بس الحين لازم نقنعهم بالصلح
المؤقت مع بعض

عواد : نصالحهم
حسان : بصفة مؤقتة .. وبعدين نولعها نار بعد ما يخلصوا ونخلص
من مجاهد

عواد : وتفتكر هيوافقوا
حسان : ما انت خاير انهم خاتم في صباعنا اعملوا كده اعملوا ..
متعملوش .. متعملوش .. هادول كل همهم مصلحتهم وبس
..

عواد : يسلم تفكيرك يا حسان .. صحيح المكر له ناسه
حسان : وكمان نعرض الشيخ صوان على قتل نسيم
عواد : اه الولد نسيم صار من رجال مجاهد والخوف يحرض كل
الشباب

حسان : ويكده نغل صدر مجاهد ضد اعمامه .. لحد ما تصل النار
لعنان السما وساعتها ما حدا هيقدر يطفئها

عواد : تسلم يا أبو الافكار
حسان : وفي النهاية يصير البقاء للمطاريد .. ونصير احنا اصحاب
الارض .. والبير (يضحكان ويخرجان)

العجوز : (داخله) .. خافقة عليك يا ولدي ومش قادرة اصونك

.. وايدي عاجزة وقيدي مانعها تمسح دمعة عيونك

نهاية المشهد

(المشهد الرابع)

- سالمة : كده برضه يا مجاهد تبيع اهلك .. تبيع سالمة
- مجاهد : بعثك كيف يا سالمة ؟
- سالمة : تستحوز على البير .. وتروح للمطاريد في الجبل منشان
تمد يدك ليهم وتعاون معاهم
- مجاهد : الحكاية غير كده يا سالمة .. بكره هتفهمني كل حاجة
- سالمة : افهم ايش يا مجاهد
- مجاهد : افهمي ان الحياة الحين للاقوى .. للي معاه القوة .. والقوة
في البير والمطاريد .. وانا اتعذبت كثير واريده الحين ارتاح
- سالمة : يا خسارة يا مجاهد
- مجاهد : انا بعمل كل ده عشائك .. انا خلاص اتفقت مع حسان
انه يتركك .. وهكتب كتابي عليكى رسمى ويوم كسب
الكتاب هتعرفى كل شيء ..
- سالمة : ولىش مافهمش الحين
- مجاهد : بعدين يا سالمة
- سالمة : انت نسيت انك زوجي امام الله
- مجاهد : وكيف انسى يا سالمة .. لكن لازم نعلن زواجنا الاول
- صوان : (داخلا) .. يا للعار .. يا للفضيحة .. سالمة مع الغريب
العاشق
- مجاهد : انا ما غريب يا عم .. وانت عارف ان سالمة لي بالعهد ..

صوان	: عار وصاب قبيلة الصواوين
حسان	: عار ليش يا شيخ صوان .. مجاهد ولد اخوك وهو احسب
	بسالة
صوان	: ايش الكلام هادا يا حسان
حسان	: بعدين اشرح لك كل شيء
صوان	: انت شايك كده
حسان	: ايوه يا سيد القوم
صوان	: اللي تشوفه .. قدامي على الدار يا سالة (يخرج)
حسان	: لا تغضب من عمك يا مجاهد .. اخدته الشهامة الغربية ..
	ما يفهم معنى العشق
مجاهد	: لسه عند وعدك يا حسان ؟
حسان	: حسان طوع امرك .. انت جيت لي الجبل وفردت جناح
	حمامة السلام كيف اذبحها .
مجاهد	: وانا ما زلت عند وعدي
حسان	: طب وراس الوالي هادا .. انا اول ما شفتك اتوسمت فيك
	الخير .. وقلت مجاهد هادا ابن حلال مصفي
مجاهد	: اريد العهد اللي بينا مكتوب
حسان	: مكتوب .. هذا العهد (يخرج له العهد) وهادا توقيعني ..
	انت متزوج سالة وانا والمطاريد لينا نص البير
مجاهد	: لكن انا كمان محتاج مساعدة عواد زعيم المطاريد الغربية

حسان : لكن انت عارف ابي ماليش تاثير عليه
مجاهد : كيف يا حسان .. دا انت كبير المطايريد واكيد عواد مش
هايرفض ليك امر
حسان : عموما هو بيعت لي مرسال .. بيريد يتعاون معاك وزمانه
جاي .. اهو جه
مجاهد : مرحب يا عواد
عواد : مرحب بيك يا زين الرجال انا اول ما عرفت انك عساوز
تتعاون مع سيد حسان قلت لا انا كمان اتعاون معاه
مجاهد : اكتملت بنود المعاهدة انتوا تكونوا طوع امري وتخلصوا
عن مشايخ القبائل مقابل نص البير
حسان : وتبقى انت زعيم المطايريد (يضحك الجميع)
مجاهد : امضوا على العهد (يقوم الجميع بالتوقيع على الورقة)
عواد : بس نريد الامر سر يا مجاهد .. عشان انت عارف وضعنا
صعب مع عمامك
مجاهد : سر كم في بير (لنفسه) لكن مصير الحمي يتلاقى
عواد وحسان : مبروك يا زينة الشباب يا مجاهد كده بقينا اصدقاء
شحات : (داخلا) ياباه .. ايش اللي صار .. عواد ودعروور ..
ثعبانين مع عصفور
حسان : احنا ما نريد لمجاهد غير كل خير
شحات : من وين ييجي الخير مع الغطا والزيير :

عواد : الخير موجود باهل الجود
شحات : يا دعرور قول الحق .. انت صادق ولا لا
حسان : (في غيظ) دمك خفيف يا شحات .. خاطرك الحين يسا
مجاهد .. (يخرج جان)
مجاهد : اكتم السر يا شحات .. اياك تتخرف مع حدا
شحات : اتخلط الحابل بالنابل .. والانس بقى جان .. وتقلب البقرة
عزة والعزة من غير ودان
مجاهد : بعدين هتعرف كل شيء
مشاهد : (داخلا) قتلوا نسيم يا بلد (تدخل مجموعة من اهل
القبيلة تحمل جثمان نسيم) قتلوا نسيم يا مجاهد
شحات : الطوفان جاي يا عربان هيفرق الشباب والولدان
مشاهد : قتلوا نسيم يا بلد .. قتلوه وهو في يده فاس بيزرع خير
للبلد .. منشان يرويك من زرعه .. قتلوه عشان قال لهم لا
.. اه يا بلد الخوف عشش في قلوبها .. والسوس ينخر في
حيوبها .. قتلوه علشان قال ليهم لا .. لا يا مشايخ القبائل يا
كبار يا عاقلين مين هيسيل دم مين .. مين هيقول اخو مين ؟
المعجوز : ولدي .. ولدي لسه صغار .. خوفي يا ولدي من اخر
المشوار .
مشاهد : لا .. اليوم قتلوا نسيم .. وبكرة الدور على مين .. على
سلام ولا حسين ولا علي ولا انت ولا انت .. وكل يوم

هيموت راجل هنا وراجل هناك .. ولصالح مين ومنشان مين
وفي النهاية خراب يعم كل القبائل .. وغربان تنعق على
الاطلال .. ارض تبور .. ونار غول والضحايا العربان
والسلاح أغرب ..

شحات : الطوفان جاي يا غربان .. هيفرق الشباب والولدان

مشاهد : انت خابر مين اللي قتله يا مجاهد

مجاهد : الصبر يا شيخ مشاهد .. الصبر ياهل القبيلة .. هانت

وبكرة المستور هيبان .. والحقيقة تبان .. الصبر ياهل القبيلة

موال : (غناء)

ايش اللي جرى وايش اللي غاب

طير المحبة انقهر ولا بقينا اغراب

شارد يا طير مينا حارد على غناوينا

صوتك يا طير اهاتك كسروا يا طير جنحاتك

فماية الشهيد

(المشهد الخامس)

(داخل كهف المطاريذ في الجبل - المشهد اضاءة خافتة مؤامرة)

صخر	: انا موافق على ما قاله عواد
صوان	: وانا موافق على ما قاله حسان
حسان	: الخطر واحد ومجاهد شوكته كبرت
عواد	: ولازم نتفق منشان نخلص منه
صوان	: ولد اخوك مجاهد هيج علينا القوم .. واستولى على السير والارض .. حلمي وحلمك
صخر	: وايش المطلوب مني
صوان	: الخطر صابني وصابك .. ومدام اتوحد الخطر .. يبقى لازم يتوحد الهدف
صخر	: وايش هو الهدف
صوان	: قتل مجاهد
صخر	: ما تقتله انت ورجالك
صوان	: وتريد اهل القبيلة يقفوا ضدي .. واكون انا قاتل ولد خي
	.. تضع هبتي وسط قومي
صخر	: وتريدني اقتله انا ..
صوان	: لا نقتله احنا الاتنين
صخر	: وكيف هنقتله

حسان : اقولكم انا .. الشيخ صوان يوهمه بانه موافق على زفته
لسالة .. وان الحرب واقفة وفيه هدنة ويوم زفته وفي عز
الفرح رصاصه طائشة او ضربة سيف في الخلف موحدة
عواد : ومات وعمامه راضين عليه
حسان : ويبقى كفناه بحدوم فرحه
عواد : وبدل ما يدخل على عروسته
حسان : ادخل عليها انا
عواد : وهو يدخل القبر
(الجميع يضع يده على يد بعض)
الجميع : اتفقنا
نهایة المشهد

(المشهد الاخير)

مشاهد	: هم شوية يا شحات العريس زمانه على وصول
شحات	: هو الحين عرس مجاهد على سالة
مشاهد	: ايوه يا شحات - الفرحة اللي انتظرتم من زمان
شحات	: يابه .. ودي اتزوج محبوبتي
مشاهد	: انت ليك محبوبة يا شحات
شحات	: نعم وكان ودي اخطفها على حصاني العربي الاصيل وما اسعفني
مشاهد	: وايش لوها
شحات	: عيونها معمصات .. وشعورها مكرمشات .. وودانها مطولات .. ومنخيرها شلالات .. وارجلوها ايدين مقشحات .. وفمها بلاعات .. هـ .. حزر فزر ايش تطلع
مشاهد	: (يضحك) الله يخيك يا شحات داعبت البسمة المدفونة تحت الجرح
	(نسمع صوت اغاني الافراح)
شحات	: اهو العريس والعروسة وصلوا
	(يدخل الجميع وحسان واهل القبيلة في زفة وطبل وزممر وغناء)

- حسان : كله سمع هس .. الليلة فرح وسامر .. انا حسان زعيم
المطاريد متبرع بميت ناقة عربي وميت اردب قمح لجل عيون
العروسة والعريس
- عواد : وانا عواد زعيم المطاريد متبرع بميت اردب قمح وموالم
وفاكهة عشاء للعريس والعروسة
- حسان : مبروك يا عريس .. تم كتب كتابك وعلي مقامك وسط
المشايع
- عواد : لفوا حواليه الزينة وعلوا الطبول والمزمار .. لجل ما تطورد
عنه الحمود واللي عيونده سحرها نار
- مجاهد : حياكم الله .. لكن اريد اقول كلمة وافشي سر (لفظ)
سالة صارت زوجتي امام الله ورسوله .. الليلة بالي ارتاح
الليلة ان الاوان افضح المستور .. ونفضح على الملاء خيانة
الدسيس .. ومؤامرات الاغراب
- صوان : ايش الكلام هادا .. انا غلطان اللي وافقت على زواجك
من سالة
- صخر : فرح هادا ولا معزى الولد رجع مجنون تاني
- مجاهد : اسمعوا يا مشايخ العربان .. الليلة اقدم لكم وثيقة الاحفاد
والمؤامرات القادرة ضدكم وثيقة مكتوبة بالدم الزفر وعفانة
الكلمات .. وثيقة وضع فيها مصالح المطاريد . هادي هي
الوثيقة .. المطاريد ساوموني على سالة .. ساوموني على

حياتكم واهلكم في مقابل حصة من مية البير .. كانوا
بيردوا يفتصروا سالة بالقوة .. ما تستغريوش السر هادا ما
حدا يعرفه غيري وسالة والمطاريد .. (لفظ)
حسان : (ضاحكا) لعبة حقيرة من تلميذ حقير .. انا الحق علي
اللي سلمتك سالة
عواد : محدش يهين العريس .. الليلة ليلته ودخلته وحقه يفرح
ويقول كل اللي هو عاوزه
مجاهد : تنكر انك ساومتني على سالة والبير انت وعواد
حسان : سالة كانت هتبقى مراي لكن شهامي وخوفي عليك
وضعت يدي في يدك .. دا انت اللي جيت لي لحد الجبل
.. يعني لحدودي
صوان : كده .. كده يا مجاهد .. بعض اليد اللي اتعدتلك .. حسان
اللي ساعدك وتنازلك عن سالة .. وخلاي وافقت على
زواجك منها تتهمه بالخيانة
صخر : خلق تخاف ما تختشيش
مجاهد : صدقوني يا عماء المطاريد ساوموني على سالة والبير وعلى
الوقوف ضدكم هما اللي طلبو مني هادا ياخدوا نص البير
ويتخلوا عنكم
صوان : وين دليلك على هادا يا مجاهد .. نريد دليل

حسان : اه وين دليلك على هادا يا شاطر ولا اقام اسياذك
وخلص

مجاهد : هادا دليلي .. خدوا اقرؤا الوثيقة يا عم اقرؤها وشوفوا
بعينكم دليل خيانتهم

(ياخذ صوان الوثيقة وينظر اليها ويضحك وتتساقط من
واحد الى الاخر وتستمر عملية الضحك)

مجاهد : ايش اللي بيضحكك يا عم (ياخذ الوثيقة) لا .. مش
ممكن مش معقول .

حسان : بلها و اشربها يمكن تشفيك من جنونك

مجاهد : عذاب يا خلق .. و دم انحجز في العروق .. قولولي الدم
اللي بيجرى في عروقكم عربي و لا مغشوش .. مين باع
حلمي .. مين يا شحات .. مين اللي باعني يا شيخ مشاهد

.. حسين و لا سليم و لا مسلم و لا على .

مشاهد : ايش اللي صار يا مجاهد يا ولدي

مجاهد : باعوني يا شيخ مشاهد

مشاهد : كيف يا ولدي ؟

مجاهد : الوثيقة بيضة تاريخها و عنوانها و كلامها ممسوح ..
خدعوني .. أنا خلاص راحل من اهني يا شيخ مشاهد ..
راحل من أرض الخراب .. أبحث عن واحة خضرة .. لسه
فيها قلوب الخلق تنبض بالحب .. لسه عقولهم زينة .

مشاهد : لا يا ولدى اياك ترحل .. ما تيأس يا مجاهد .. هما يريدوا
يهزموك .. عشان تزهق و تترك وطنك و ترحل .. اقف
قدامهم مرة و اتين و ثلاثة .

مجاهد : أنا لوحدي مش هقدر أعمل حاجة يا شيخ مشاهد .. لازم
الخلق هما اللي يقفوا معاى .. الخلق كلها خابرة ملاعيب
المطاريد .. لكن الخوف .. الخوف معشش جواهم .. أنا
راحل

سالمه : لا يا مجاهد .. احنا ما صدقنا انك عدت .. مصدقنا حد
ياخد بيد الخلق لير الامان .

مجاهد : سبيني ارحل يا سالمه .. طريق همومي طويل .. سبيني ارحل
وادوق طعم الغربة .. يمكن تكون ارحم

سالمه : لا .. لو كل واحد انزى مرة و ترك ارضه وناسه القبائل
هتبقى خراب لليوم والغربان

شحات : الطوفان جاي يا عربان

سالمه : انا محتاجالك يا مجاهد

صوان : اتحشمي يا مجرمة و كمان ليك عين

حسان : اتركها يا شيخ صوان هادا زوجها .. من حقها تساعده
وتبكي عليه - قصدي تتمسك بيه .. جرى ايه يا شيخ
صوان .. هنسيب ابن اخوك كده من غير ما نتم فرحته احنا
برضه ناس في قلوبنا رحمة و لازم العريس يفرح .

صوان : تعالى يا عريس .. تتمم فرحك على عروستك .. انت
 مهما كان ولد اخونا
 سالة : لا يا مجاهد
 مشاهد : خللي بالك يا مجاهد
 صوان : دقوا الطبول وزفوا العريس ما تخافيش يا عروسة دا فرحك
 وانت بنتي الوحيدة
 (تدق الطبول وتعلو والجميع يلتف حول العريس والعروس
 ومع ارتفاع صوت الطبول يخرج احدهما خنجره ويضعه في
 صدر مجاهد مع صرخة سالة)
 صوان : مبروك يا عريس الليلة دخلتك من حقل تفرح
 صخر : الليلة علوا الراية السودا ودقوا طقوس الحرب
 شحات : الطوفان جاي يا خلق .. الطوفان جاي يا عربان ..
 الطوفان جاي يا شيخ مشاهد .. قتلوا مجاهد يا شيخ مشاهد
 مشاهد : مجاهد ولدي .. ضاع الفارس والخيال
 المعجوز : ولدي يا حلم معصوب جوه العيون .. و ده دم مين اللي
 البقر داسوه
 شحات : الطوفان جاي يا عربان .. هيفرق الشباب والولدان
 (يتزل شحات الى الصالة .. والمعجوز ومشاهد يقفا في وضع
 منتصف المسرح)
 بينما في الخلف مشهد من الخلف بانوراما لاغتصاب سالة ..

العجوز

شحات

مشاهد

: ولدي .. انت فين يا ولدي ..

: الطوفان جاي يا عربان .. هيقرق الولدان والشباب ..

: (من منتصف المسرح)

الطوفان جاي يا عربان .. هيقرق الولد والارض .. اصحوا
يا عربان .. فوقوا .. لامتى المطاريد هتفضل في الارض بمدوا
ايديهم لقدام والغدر من الظهر .. بير الميه ممكن يكفى
العربان بس .. لكن المطاريد ما هم حق فيه .. المطاريد
بيفتصبوا كل حاجة في حياتنا .. واحنا اللي بنساعدهم على
هادا .. البوا العربان على بعض .. خلوكوا تشموا دماكم
على انما عطر .. خلوكوا تشربوا دماكم على انما ترياق
او عوا تخلوا البير يفرق بينكم .. لسوا صفوفكم وحدوا
كلمتكم .. اصحوا قبل الطعنة الكبرى ما تيجيلكوا من
ظهوركم .. اصحوا قبل ما تكونوا في التاريخ مجرد ذكرى

..

(يردد الشيخ مشاهد كلامه مع تدخل العجوز والشحات)

وبينما تزل الستار

ترتفع

(الراية السودا)

رئيس مجلس الإدارة
محمد أحمد عبد العظيم
مدير
فرع ثقافة شمال سيناء
رئيس التحرير
محمد عايش عبيد

أسرة التحرير
محمد عايش الشريف
محمود طيبل
حسنه فتحي محمد
حاتم عبد الهادي السيد
عبد القادر عبيد عباد
حسن غريب أحمد

7

11

12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43 44 45 46 47 48 49 50 51 52 53 54 55 56 57 58 59 60 61 62 63 64 65 66 67 68 69 70 71 72 73 74 75 76 77 78 79 80 81 82 83 84 85 86 87 88 89 90 91 92 93 94 95 96 97 98 99 100 101 102 103 104 105 106 107 108 109 110 111 112 113 114 115 116 117 118 119 120 121 122 123 124 125 126 127 128 129 130 131 132 133 134 135 136 137 138 139 140 141 142 143 144 145 146 147 148 149 150 151 152 153 154 155 156 157 158 159 160 161 162 163 164 165 166 167 168 169 170 171 172 173 174 175 176 177 178 179 180 181 182 183 184 185 186 187 188 189 190 191 192 193 194 195 196 197 198 199 200 201 202 203 204 205 206 207 208 209 210 211 212 213 214 215 216 217 218 219 220 221 222 223 224 225 226 227 228 229 230 231 232 233 234 235 236 237 238 239 240 241 242 243 244 245 246 247 248 249 250 251 252 253 254 255 256 257 258 259 260 261 262 263 264 265 266 267 268 269 270 271 272 273 274 275 276 277 278 279 280 281 282 283 284 285 286 287 288 289 290 291 292 293 294 295 296 297 298 299 300 301 302 303 304 305 306 307 308 309 310 311 312 313 314 315 316 317 318 319 320 321 322 323 324 325 326 327 328 329 330 331 332 333 334 335 336 337 338 339 340 341 342 343 344 345 346 347 348 349 350 351 352 353 354 355 356 357 358 359 360 361 362 363 364 365 366 367 368 369 370 371 372 373 374 375 376 377 378 379 380 381 382 383 384 385 386 387 388 389 390 391 392 393 394 395 396 397 398 399 400 401 402 403 404 405 406 407 408 409 410 411 412 413 414 415 416 417 418 419 420 421 422 423 424 425 426 427 428 429 430 431 432 433 434 435 436 437 438 439 440 441 442 443 444 445 446 447 448 449 450 451 452 453 454 455 456 457 458 459 460 461 462 463 464 465 466 467 468 469 470 471 472 473 474 475 476 477 478 479 480 481 482 483 484 485 486 487 488 489 490 491 492 493 494 495 496 497 498 499 500 501 502 503 504 505 506 507 508 509 510 511 512 513 514 515 516 517 518 519 520 521 522 523 524 525 526 527 528 529 530 531 532 533 534 535 536 537 538 539 540 541 542 543 544 545 546 547 548 549 550 551 552 553 554 555 556 557 558 559 560 561 562 563 564 565 566 567 568 569 570 571 572 573 574 575 576 577 578 579 580 581 582 583 584 585 586 587 588 589 590 591 592 593 594 595 596 597 598 599 600 601 602 603 604 605 606 607 608 609 610 611 612 613 614 615 616 617 618 619 620 621 622 623 624 625 626 627 628 629 630 631 632 633 634 635 636 637 638 639 640 641 642 643 644 645 646 647 648 649 650 651 652 653 654 655 656 657 658 659 660 661 662 663 664 665 666 667 668 669 670 671 672 673 674 675 676 677 678 679 680 681 682 683 684 685 686 687 688 689 690 691 692 693 694 695 696 697 698 699 700 701 702 703 704 705 706 707 708 709 710 711 712 713 714 715 716 717 718 719 720 721 722 723 724 725 726 727 728 729 730 731 732 733 734 735 736 737 738 739 740 741 742 743 744 745 746 747 748 749 750 751 752 753 754 755 756 757 758 759 760 761 762 763 764 765 766 767 768 769 770 771 772 773 774 775 776 777 778 779 780 781 782 783 784 785 786 787 788 789 790 791 792 793 794 795 796 797 798 799 800 801 802 803 804 805 806 807 808 809 810 811 812 813 814 815 816 817 818 819 820 821 822 823 824 825 826 827 828 829 830 831 832 833 834 835 836 837 838 839 840 841 842 843 844 845 846 847 848 849 850 851 852 853 854 855 856 857 858 859 860 861 862 863 864 865 866 867 868 869 870 871 872 873 874 875 876 877 878 879 880 881 882 883 884 885 886 887 888 889 890 891 892 893 894 895 896 897 898 899 900 901 902 903 904 905 906 907 908 909 910 911 912 913 914 915 916 917 918 919 920 921 922 923 924 925 926 927 928 929 930 931 932 933 934 935 936 937 938 939 940 941 942 943 944 945 946 947 948 949 950 951 952 953 954 955 956 957 958 959 960 961 962 963 964 965 966 967 968 969 970 971 972 973 974 975 976 977 978 979 980 981 982 983 984 985 986 987 988 989 990 991 992 993 994 995 996 997 998 999 1000